

NOTA INFORMATIVA – ACTUALIZADA A 15.06.2020

Funcionamento do rexistro de sociedades laborais

O estado de alarma decretado por mor do **COVID-19** afectou a forma de actuar e relacionarnos coa Administración Pública.

No ámbito administrativo, a suspensión de prazos para a tramitación dos procedementos e as limitacións para a atención presencial obrigaron a cambiar a forma de funcionamento dos rexistros, se ben estas medidas xa foron levantadas progresivamente. Así mesmo, ditáronse normas que flexibilizan a forma e prazos para a adopción de acordos por parte das sociedades privadas, que teñen incidencia no cumprimento das obrigas rexistrais.

Mediante Decreto 90/2020, do 13 de xuño (DOG núm. 115-bis do 13.06.2020), deixáronse sen efecto as medidas derivadas da declaración do estado de alarma en Galicia, con efectos das 00.00 horas do 15 de xuño.

Nesta nova situación, cómpre aclarar as condicións actuais de relación da cidadanía co rexistro de sociedades laborais.

É posible acudir presencialmente aos rexistros?

As **oficinas de atención á cidadanía e de rexistro** dos edificios administrativos da Xunta de Galicia en Santiago de Compostela (San Caetano), A Coruña, Lugo, Ourense, Pontevedra, Vigo e Ferrol, prestan atención presencial. É preciso solicitar cita previa en <https://www.xunta.gal/cita-previa>.

Así mesmo, é posible acudir presencialmente ao **Rexistro de Sociedades Laborais de Galicia**. Para garantir a atención en condicións de seguridade, é aconsellable que solicite cita previa, chamando ao teléfono que figura ao final deste documento.

Podo presentar solicitudes e outra documentación en formato electrónico?

Con carácter xeral, pode utilizar a [Sede Electrónica](#) para presentar as solicitudes utilizando o modelo xenérico [PR004A](#), dirixido á Secretaría Xeral de Emprego, da Consellería de Economía, Emprego e Industria, ao que se xuntará a documentación que corresponda.

Para coñecer a documentación que debe presentar e obter os modelos dispoñibles pode acudir á [Asesoría Virtual de Sociedades Laborais](#).

Non obstante, en función da documentación que queira achegar coa solicitude, cómpre distinguir os seguintes supostos:

1. Cando a documentación consista unicamente en **documentos asinados dixitalmente**, poden xuntarse ás solicitudes electrónicas, e non é preciso achegalos en formato papel.
2. Cando á solicitude deba acompañarse de **documentación asinada manualmente** debe presentarse fisicamente nas oficinas de rexistro.

Que prazo teño para contestar un requirimento ou presentar un recurso?

Dado que xa quedou sen efecto a suspensión de prazos administrativos e procesuais, os prazos para realizar trámites ou presentar recursos son os ordinarios.

Os prazos para realizar outras xestións ante o rexistro, establecidos pola normativa de sociedades laborais, seguen vixentes?

Hai que ter en conta que o Real decreto lei 8/2020, do 17 de marzo, establece no seu artigo 40 normas específicas respecto dos prazos para formular as contas anuais, realizar o informe de auditoría e aprobalas.

Así, **o prazo de tres meses para formular as contas contarase desde o 1 de xuño**. Se o órgano de administración xa tivese formuladas as contas, pero estivese pendente de realizar o informe de auditoría (obrigatoria ou voluntaria), pode facerse no prazo de dous meses desde que finalice o estado de alarma.

Pola súa parte, **a xunta xeral ordinaria para aprobar as contas debe reunirse dentro dos dous meses** seguintes ao remate do prazo para formular as contas.

Por outro lado, o Real decreto-lei 15/2020 **ampliou en 12 meses** máis, só, para as sociedades laborais constituídas en 2017, o prazo de 36 meses do que dispoñen as sociedades formadas por 2 persoas socias traballadoras indefinidas **para incorporar unha 3ª persoa socia** e axustar a titularidade de accións ou participacións ao máximo dunha terceira parte do capital social por cada unha delas (tal e como se define no artigo 1.2.b) da Lei 44/2015, do 14 de outubro, de Sociedades laborais e participadas).

Respecto doutros prazos para realizar actuacións que deban ter efectos rexistrados e que non estean afectados polas disposicións anteriores, ao prazo establecido pola normativa hai que engadirlle o tempo durante o cal estivo suspendido (desde o 14 de marzo ata o 11 de maio).

É válida a reunión dos órganos sociais realizada por medios telemáticos?

Segundo o artigo 40 do Real decreto lei 8/2020, do 17 de marzo, aínda que os estatutos non o contemplan, e **ata o 31 de decembro de 2020, os órganos de goberno e administración poderán reunirse a través de videoconferencia ou por conferencia telefónica múltiple**, sempre que todos os membros dispoñan dos medios necesarios e o secretario recoñeza a súa identidade, e así o exprese na acta.

Así mesmo, aínda que non estea previsto nos estatutos, **ata o 31 de decembro de 2020**, estes órganos tamén poderán adoptar **acordos por votación por escrito e sen haber sesión**, sempre que o decida a presidencia, que ten que aprobalos se o solicitan polo menos dous membros do órgano.

Tamén as **xuntas de persoas socias** poderán celebrarse **ata o 31 de decembro de 2020 por videoconferencia ou por conferencia telefónica múltiple**, sempre que todas as persoas con dereito a asistencia ou os seus representante dispoñan dos medios necesarios, e o secretario do órgano recoñeza a súa identidade, e así o exprese na acta.

PARA CALQUERA CONSULTA PODE DIRIXIRSE A

REXISTRO DE SOCIEDADES LABORAIS DE GALICIA

registro-sociedadeslaborais@xunta.gal

Teléfono: 981 981 957 746

ASESORÍA VIRTUAL DE SOCIEDADES LABORAIS

avsl.xunta.gal